

Museo Arqueologico Aruba ta cumpli 18 aña di existencia!

ORANJESTAD (AAN) -- Dia 19 di december ta 18 aña pasa cu a inaugura Museo Arqueologico Aruba, e tempo ey den su edificio na Zoutmanstraat-1. Museo Arqueologico Aruba tabata parti di e teritorio insular Aruba y despues di 1986 a bira museo di pais Aruba. Como organizacion Museo Arqueologico Aruba ta cay bao Ministerio di Cultura y ta parti di Instituto di Cultura.

E meta principal di Museo Arqueologico na 1981 tabata pa muestra na publico un coleccion di artefactonan arqueologico haya na Aruba. E exposicion permanente a worde habri den salanan di e prome piso di e edificio den Zoutmanstraat y e parti abao tabata ser usa pa warda y studia material arqueologico.

Metanan di e museo tabata inclui investiga, documenta, preserva y promociona herencia arqueologico di Aruba.

Mescos cu tabata e caso prome cu 1981 a sigui, despues di inauguracion di e museo, cu excavacionnan na diferente lugar. A inventariza e lugarnan arqueologico di nos isla na 1990 y a base di esaki a establece un programa di investigacion y documentacion.

Por menciona e investigacion na Malmok, cual resultadonan a worde publica na 1990 y esun di Tanki Flip cu a ser publica na 1997.

E exposicion permanente a worde cambia na 1990 y tabata inclui resultado di e excavacionnan na Malmok. A pone varios excavacion temporal y a cuminsa na 1989 cu e serie "Publicacionnan di Museo Arqueologico Aruba". E serie di publicacion actualmente ta contene 8 buki cualnan no solamente ta obtenible na Aruba pero ta den biblioteca y institucionnan rond mundo.

Ya for di 1990 a constata cu e edificio di Zoutmanstraat a bira mucho chiquito pa e actividadnan di Museo Arqueologico Aruba. Lugar adecua pa exhibi, warda y studia material, ricibi schoolnan, duna charla, etc., ta esencial pa un museo. Pesey a cuminsa traha na 1990 na e proyecto di compra di edificio Ecury ya cu e lugar aki tabata ofrece e espacio necesario pa e actividadnan di Museo Arqueologico Aruba

y tambe e ta bon situa.

Museo Arqueologico Aruba a muda na 1996 pa edificio di Instituto di Cultura for di cual e ta operando te awe. Aunque e espacio ta mas chiquito cu na Zoutmanstraat a logra cuminsa y mantene un programa educativo pa schoolnan. Pa dos aña sigui a organiza tambe un programa vacacional.

Sinembargo e problema di espacio ta haci casi imposible proyectonan grandi di investigacion. Pesey Museo Arqueologico lo sigui pone enfasis riba e necesidad pa restaura y equipa edificionan Ecury mas pronto posible pa duna nos herencia arqueologico e lugar cu e merece.

Un prioridad di e ultimo dos añanan ta pa cambia e exposicion permanente. E exposicion actual ta anticua pa loke ta trata informacion y metodonan di presentacion.

Ta spera cu e importancia di un proyecto pa renova e exposicion worde comparti door di Ministro di Cultura.

Actualmente ta planea pa ehecuta e proyecto aki asina cu e ser presenta pa financiamiento na UNOCA door di Ministro di Cultura of door di Consejo di Ministro.

E ultimo añanan aki Museo Arqueologico Aruba a traha activamente cu partnernan local pa logra promociona y cuida nos herencia cultural. Asina por menciona e colaboracion di e.o Museo Historico, Museo Numismatico, Parke Nacional Arikok, D.O.W y Domeinbeheer.

Pa e aña venidero tin hopi plan y lo cuminsa na januari 2000 cu un actividad cu lo inclui arte, literatura, y danza den combinacion cu arqueologia. Lo cuminsa e.o cu un ciclo nobo di charla y lo amplia e programanan educativo pa nan inclui actividad den tempo liber pa hoben y adulto.

Museo Arqueologico Aruba kier gradici tur instancia y persona cu durante e ultimo 18 añanan aki a colabora cu e museo den un of otro forma. Na miembronan di personal, kendenan ta haciendo un trabao cu hopi dedicacion ta bay un palabra di pabien. Ta danki na boso cu un parti importante di nos historia ta ser documenta y cuida pa generacionnan futuro.

